

**Uunga siunnersuut: Kommunini illuuteqarnermik ingerlatseqatigiiffiit pillugit  
Inatsisartut inatsisaat nr. x, xx-ip xx-anni 2011-meersoq.**

*Atuuffia*

§ 1. Inatsit manna atuuppoq kommunini illuuteqarnermik ingerlatseqatigiiffinnik pilersitsinernut.

*Imm. 2.* Kommunini illuuteqarnermik ingerlatseqatigiiffiit aktiaateqarluni ingerlatseqatigiiffittut pilersinneqarsinnaapput.

*Imm. 3.* Kommunini illuuteqarnermik Ingerlatseqatigiiffiit Kalaallit Nunaanni suliaqarsinnaapput sanaartornernik, pigisaqarnermik, inissianik pigisanillu aalaakkaasunik allaffissornikkut ingerlatsinernik aamma attartortitsinernik tunngasunik.

*Pigisaqarney, pilersitsineq aamma ingerlatsineq*

§ 2. Kommunit illuuteqarnermik ingerlatseqatigiiffinnik pilersitsinnaapput, pigisanik aalaakkaasunik sanaartorsinnaasunik, attartortitsinnaasunik aamma allaffissornikkut ingerlatsinnaasunik.

§ 3. Suliniutinut, kommunini illuuteqarnermik ingerlatseqatigiiffiit aallartitaannut aamma suliaannut, kommunit aningaasaliissuteqarsinnaapput imaluunniit taarsigassarsititsinnaapput.

*Imm. 2.* Kommuni allamik illuuteqarnermik ingerlatseqatigiiffimmik suliassat § 1, imm. 3 naapertorlugu isumagineqartussat pillugit isumaqatigiissuteqarsinnaavoq, taamatuttaaq kommunini illuuteqarnermik ingerlatseqatigiiffik pisortat oqartussat allat suliffeqarfiillu allat pigisaannik aalaakkaasunik allaffissornikkut ingerlatsinernik suliassanik isumaginnittussat tiguisinnaavoq.

*Imm. 3.* Kommunit inissiaatai kommunini illuuteqarnermik ingerlatseqatigiiffinnut akeqanngitsumik aamma pappiaqqat nalillit naqissusiinermi akitsuutaanik akiliuteqartitsinani tunniunneqarnissaat Naalakkersuisut akuersissutigisinnaavaat. Tamanna aamma atuuppoq kommunini inissianut attartortittakkanut, sanaartornermut atasumik imaluunniit pigilerneranut atasumik Namminersorlutik Oqartussanit taarsigassarsilluni imaluunniit tapiiffigineqarluni pigineqartunut.

*Imm. 4.* Inissiat imm. 3 naapertorlugu tunniunneqartut kingusinnerusukkut tunineqarpata, Namminersorlutik Oqartussat tapiissutaat utertinneqassapput imaluunniit inissianik nutaanik sanaartornermut imaluunniit sanaartorfigiuminarsaanernut atorneqassapput.

§ 4. Kommunini illuuteqarnermik ingerlatseqatigiiffinnik pigisaqarnermut, pilersitsinermut aammalu ingerlatsinermut maleruagassat erseqqinnerusut Naalakkersuisut aalajangersinnaavaat.

§ 5. Kommunini illuuteqarnermik ingerlatseqatigiiffik, Naalakkersuisunit akuerineqaqqaartigani:

- 1) taarsigassarsinnaanngilaq imaluunniit akiitsunik allanik pisussaaffilersinnaanngilaq,
- 2) qularnaveeqqummik imaluunniit pisussaaffigileratarneqarsinnaasunik tiguisinnaanngilaq,

3) attartornermik imaluunniit pigisamik ukiumoortumik akiliuteqartarnikkut atuisinnaatitaalluni pigileriartorneqartussamik pissarsinissamut isumaqatigiissuteqarsinnaangilaq 2,5 mio. kr.-it sinnerlugit nalilinnik imaluunniit ukiut tallimat sinnerlugit sivisussuseqartumik ingerlasussamik,

*Inissiat attartortittakkat tunniunneqarnerat*

§ 6. Kalaallit Nunaanni Namminersorlutik Oqartussat inissiat attartortittakkat kommunini illuuteqarnermik ingerlatseqatigiiffinnut tunniunneqarneri pillugit Naalakkersuisut erseqqinnerusunik maleruagassanik aalajangersaasinnaapput.

*Imm. 2.* Tunniussinerit Inatsisartut Aningaasaqarnermut Ataatsimiititaliaannit akuerineqartassapput imaluunniit Inatsisartut Aningaasanut inatsisaanni ilaatinneqartassapput.

*Imm. 3.* Kommunit inissiaatai attartortittakkat kommunini illuuteqarnermut ingerlatseqatigiiffinnut tunniunneqarneranni Namminersorlutik Oqartussat tapiissutaat utertinneqassanngillat.

*Atuutilerfia*

§ 7. Inatsisartut inatsisaat manna atuutilerpoq januarip 1-ani 2012-imi.

*Kalaallit Nunaanni Namminersorlutik Oqartussat, ulloq uu.qqqqq 2011.*

Kuupik Kleist

/

Anthon Frederiksen